

TERRO NOSTRO

L'assemblado generalo di Nacioun Unido a declara pèr 2015, l'an internaciounau de la Terro...



# Prouvènço d'aro

Tóuti li mes, lou journau de la Prouvènço d'aro

Abriéu de 2015

n° 309

2,10 3

## Paraulo de Sendi

Lou Sendi de Prouvènço, lou Sendi de Lengadò-Roussihoun emai lou Felibrige fuguèron counvida à la presentacioun d'un proujèt di de "Chivau-Blanc" pèr l'associacioun "Couleitiéu Prouvènço".

Sendi de "Felibrige Mantenènço de Prouvènço" decidèrè après refleission de me rèndre au counvit e escoutèrè uno ouro de tèms la presentacioun dóu proujèt avans que s'entamenèsse un tour de taulo di persouno presènto. Lou proujèt, previst sus la coumuno de Chivau-Blanc dins la Vau-Cluso, se vòu èstre un òusservatòri de la lengo e de la culturo prouvençalo, mai es un proujèt que nous a sembla proun estrechoun bord que pèr aquelo presentacioun soulamen uno dougeno d'associacioun ié fuguèron counvidado, d'associacioun d'aiours pas fourçadamen d'interès regiounau, mai souvènti-fes de coumpetènci loucalo, ço que m'estounè forço. De mai se diguè que dintre éli, lis associacioun absènto èron escusado e soustenien lou proujèt? Enfin, ai cresegu un moumen que se trufavon de nautre e de iéu en particulié, mai basto! Lou poun lou mai tihous fuguè l'esplico dóu moutage finau de l'òusservatòri que se divisarié en dos mita d'un round, d'un caire un ensèn de coumessioun ounte lis associacioun aurién de representant à titre counsultatiéu e de l'autre l'ourgano decisiounari mena soulet pèr l'associacioun "Couleitiéu Prouvènço" emé lou poudè de *diktat* assoulu sus lis acioun retengudo. Autant dire que lis associacioun participant i coumessioun farién "aléujanço" e pas mai!

Faguèrè tres remarco aqui sus e me fuguè respoundu :  
- que pèr l'amenistracioun de l'òusservatòri quàuqui representant d'òutris associacioun pourrien s'apoundre au Counsèu d'amenistracioun de l'associacioun "Couleitiéu Prouvènço" plenamen gestiounari de "Chivau-Blanc". Finalamen, un pau coume dins un counsèu municipau, l'aurié la majourita e l'òupousicioun minoritari.

- que l'òujeitiéu èro d'aguè un fube d'emplega pèr pièi faire lou travai que la majourita decidarié?

Ma counclusioun fuguè que coume d'en pertout, aquéu qu'aurié li sòu, coumandarié la musico e lis autre regardarien passa la fanfaro en metènt un moucadou sus sis idèio e travai.

Vai sènso dire que revenguèrè sènso grandò ilusioun, tant sus lou plan culturau, qu'aquéu proujèt vòu s'apoudera l'ensèn dóu travai dis associacioun, que sus lou plan financiè (Regioun, Despartamen e Couleitivita loucalo auran de despensa de soumo counsiderabla au moumen que demandon en cadun de faire d'ecounoumio).

Lou Felibrige pòu e vòu bèn travaia emé l'ensèn dis associacioun representanto de la culturo nostros, mai d'egau à egau coume lou fai desempièi d'an, mai pas jamai acetara de leissa pendu au cavihè soun noum e sis idèio touto drecho vengudo di Primadié e de Frederi Mistral d'en proumié.

Noun, càri Felibresso e car Felibre, siéu, e pènse, vous emé iéu, pas lèst à abandouna mai de cènt cinquanto an de travai dins la draio de Frederi Mistral, pèr uno téulisso alor que dins la vilo de z-Ais avèn desempièi quasimen trento an un liò de rescotre dubert e acuiènt ounte poudèn s'acampa, escambia e travaia ensèn sus li poun coumun is un e is autre (sènso coumta que Prouvènço es grandò e que z-Ais es bèn mai centrau que lou vilage de Chivau-Blanc). Pièi à-z-Ais, la toco es pas d'òusserva, es d'agi. *L'Oustau de Prouvènço* aqest equipamen de raionamen regiounau lèst à grandò encaro e à respondre is aspiracioun atualo.

Apoundoun

Desempièi l'escrituro d'aquéu tèste avèn e douc ai reçu lou comte-rendu de l'acamp fa pèr lis ourganisaire, proun fidèu de mi paraulo e presso de poucioun e n'èn rènde gràci, senoun que foro d'acò, lou pessimisme dis uno e dis autre presènt sus lou deveni e subre que tout sus lou founciounamen d'aquel òusservatòri es pas éu représ dins lou tèste prepausa, de tout segur, pèr pas esfraia e escoundre li sacrifici qu'éli déuran faire lou moumen vengu.

Gui Revest

## Lou Tresor de Prouvènço



### XXIXen Printèms prouvençau à La Ciéutat Tresor de Prouvènço

dóu dissate 11 d'abriéu au dimenche 19 d'abriéu

**Mostro à la capello Santo-Ano de La Ciéutat, Plaço Esquiros, duberto au publi de 9 ouro à miejour e de 2 ouro à 5 ouro e miejo chasque jour franc lou dimenche.**

**Acuiènço dis escoulan tóuti li jour.**

**Dissate lou 11 d'abriéu**

- Duberturo de la mostro à la Capello Santo-Ano. Inaguracioun à parti de 11 ouro. Danso, cant, marcat prouvençau.

**Dimenche lou 12 d'abriéu**

- Espetacle à 3 ouro dóu tantost sus la Plaço dóu 8 de mai 1945, sus lou tèmo de la mar e la pesco. Group counvida: *La niado carnousenco* (Carnous), *Lei dansaire de Garlaban* (Aubagno), *Lei bouscarlo* (Alau).

**Dilun lou 13 d'abriéu**

- À 6 ouro dóu tantost, à l'Oustau dis Associacioun, Plaço Evariste Gras, counferènci: *Lis artisto qu'an canta La Ciéutat*, pèr M. Pèire Benedetto.

**Dimars lou 14 d'abriéu**

- À 6 ouro dóu tantost, à l'Oustau dis Associacioun, Plaço Evariste Gras, counferènci: Li moulin à La Ciéutat pèr M. Enri Pes.

**Dijòu lou 16 d'abriéu**

- À 5 ouro dóu tantost, li pichot dansaran sus la plaço Esquiros.  
- À 6 ouro dóu tantost, dins la capello Sant Jousè, repeticioun duberto au publi, de la couralo de *L'Escolo de la Ribo*.

**Divèndre lou 17 d'abriéu**

- À 6 ouro dóu tantost, à l'Ous-

tau de la Coustrucioun navalo, Quèi Francès Mitterrand, counferènci de M. Neulet: *La genèsi d'un navire* (pèr aquelo counferènci, reservacioun òbligatòri dóu tèms de la mostro).

**Dissate lou 18 d'abriéu**

- À 11 ouro dóu matin, un concert pèr l'ourquèstro d'armounio, segui d'un aperitiéu.

**Dimenche 19 d'abriéu**

- Messo à 10 ouro dóu matin e danso sus lou porge de la glèiso.

M. B.

### William Bonaparte Wyse

Lou pouèto prouvençau nascu en Irlando que marquè l'istòri dóu Felibrige...

Pajo 3

### Lou Pargue di Ceveno

Es un pargue unique en Franço, lou soulet en mountagno mejano...

Pajo 6

### Jan-Enri Fabre l'etnologue

Jan-Marc Courbet nous revèlo un aspèt incouneigu d'aquel ome...

Pajo 12